

ጳውሎስ ቆላስያስ መረሃ ከተሮ ሶህኑተ አጉስ

ኩ ሶህኑት ከተበንቶኢሁ ቀወ እሰያ ዬኖ ኤፌሶን ከተማን ሸርቂን ቆላስያስ ከተማን ሄኣ መገን አመዕናኖ ዱእ ሞኒሃት፤ ኩ መገን አመዕናኖ ዱእ ሞነት ኡርቶኢሁ ጳውሎሴን እህበጎሬሁ ሮም ግዛት እኮ እሰያ ሀዕኑረ ከተማ እኮ ኤፌሶኒች እንጂላ ተማርስታአረ ሶኮሃ እኮቤቺሃ ቆላስያስ መረሃ ሹምነቱ ዮስ እቅ፤ ቆላስያስ መገን አመዕናኖ ዱእ መን ኣዜን «መገኑ ደጎተለከ ዊመ ጡሙ ደእቶተ ጉዕሙንኩ መኑ ጠሊልመ ኢያን ዋልቀተለከ ሹምነቲሃ ሰገዱ ሀሰስኖ» ይታ ክዝብ አስተማረት ሄኡስ ጳውሎስ ሞጮጭዮ እቅ፤ ሁኩ አስተማረት ይታ ዋሉ ጠዉ «ጉዕሙንኩ መኑ ጡርከም ሴሪሃ ጠገመለከ እቶታ ዋሉ ሴሪሃ አገሩ ሀሰስኖስ» ዮኖሃን።

ጳውሎስ ከ ሶህኑተ ከተሮሁ ሀንቅ አመዕነቲ ሶህኑተ ሆንጠህሲን እስ ክዝብ ትምርት ቶጉ ግብሃት፤ ሆንጠህሹ መሰሊች ቡዕሉስ «መሲህ ኢስ ዊመ ጡሙ ኣሰኖ፤ ሁኩ ዋሉ አመዕነቱለከ እኤኖርቺ እኮጎሬ እሲች ቄርስታኦ» ዮኖሃን፤ መገኑ መሲህ ኢሲን ኣዱንያ አል ከለቆ፤ እስ ኣዱንን ገይሰቤቹ ፈንቀሽ ኤበኖስ፤ ኣዱንያ አሉ ጡም ተብሶሁ ሄኣኖሲሁ መሲህ ኢስ ቀልቢን አመዕነንት፤ ከን ሃሊን ጳውሎስ ኩ ሎሩ ትምርቱ አመዕናኖ ሄኡን ሀት አት ሆጎን ሆስሳጎሬ ኩለኖ።

ከ ሶህኑተ ጳውሎሴች ቶግ ቆላስያስ ኢልሶተ ሶሀሞ ቲቶን ሜጡብ ሄዕዮ አናሲሞሴ እኮገ ለኡ ሀሰስኖ፤ ህካን እኮቤቺሃ ጳውሎስ አናሲሞሴ ዬኖ ሮስቶተኔሃ ፊልሞኒሃ ዋልት ሶህኑተ ከተሮኡ፤

መጻፉስ አፎሃ

ኣጉስ (1፡1-8)

መሲህ ኢስ ሀለትለከ ሆጉተ (1፡9—2፡19)

መሲህ ኢሲን ሃዕሮ ሄኡ (2፡20—4፡6)

መጨረሻስ (4፡7-18)

1 መገን ሀሰሻን መሲህ ኢሲ አሳቤቹ እኮም ጳውሎሴችለከ አመኔቤቲች ጢሞትዎሴች ሶህንቶአተ ሶህኑ።

2 ቂላስያሳን ሄኣሁኡ መሲሂን ጠሊልቶ አመዕነንቶ አመዕናኖተ መገኒች አኒቶኔ ኣሰቱትለከ ወገሬቱ እሁንክዕኔ።

ጳውሎስ መገኘት ገለትጩስ

³ ክዕኔሃ ዱኦ አዕናም ወክት ቀርቻኔ መሲህ ኢስ እነ መገኙ ጉዕመ ወክት ገለትጩናንሰ።

⁴ መሲህ ኢሳን ዮሀዕኔ አመዕነቱለክ አመዕናኖተ ጉዕሚንከ ዮሀዕኔ ኢተተ ሞጮጮኖም።

⁵ ሀንቅ ላገተ እኮ እንጂላ ሄጭ ክዕኔቤቹ ኢሌ ወክት እሲን ዮ ተብሳሃ ሞጮጮቴንታኣ፤ ህካን እኮቤቹሃ አመዕነቱክዕኔለክ ኢተክዕኔ እጃረንቶኢሁ ሰማን ተቃጠብ አገረኖ ህክን ተብሌ አሌኒት።

⁶ አዕኑ እንጂላ ሞጮጮቴንታኣለክ መገን ኣሰቶ ሀንቅ ደጌነተ በር ጀመር ኩ ኢንጂሉ ክዕኔ በላን እኮሀንገን ኣዲንያ አሌን ጉዕማንን አቶት አሌንትለክ ነጽ አሌኒት።

⁷ ህካንን ክዕኔተኔሃ መሲህ አመዕነም ካዲንቹ እኮሃለክ ኒን * ማጡበ አኦኖ ኢተም ኤጽፋራ ኩሎሀዕኔ።

⁸ ህትን እሰ መገን አያኒን ገገጫክዕኔ ኢተቀሙክዕኔ ኩሎኔ።

⁹ ህካን እኮቤቹሃ ከ ጠወ ሞጮጮኖም በሬቻ ጀመር አዕኑ ሀይመተለክ ሰውት ጉዕመንከ መገን ሰውት ደጌነተ ዊሙ ደጉ ሄኦሀዕኔተ ክዕኔሃ ዱኦ እኡለክ መገኑ ኡጩ ኡጉርኖምበኣ።

¹⁰ ህትን ቀርቹሃ ሀሰሰኖገ ሄኤንገለክ ጉዕማንከ ጠዋን እሱ ሙንዲሲሴንገን ጡመ ሆጎን አቶተ አቶቴን መገኑ ደጌን ነጽቶኖተ ዱኦ አዕናም።

¹¹ አታዕሊን ጉዕመንከ ጠወ አታሊሃ ተቃጠቤንተረ እኮኖተ ቀርቹ ሎረ ዋልቃን ጠረኝመሰ ጉዕመንከ ኣሱንክዕኔ።

¹² ህትን ኑር ዋምነት ኣዜን ጠሊላኖን ሜጡበ ርሰተ ቤቀንቴንተገ አበቀዕዮሀዕኔ መገኑ እነ ሙንዲኖን ገለትጩዬሰ።

¹³ እሰ ቱንሰቻ ዋልቃች ጡምሸኔ ኢተም ቤትሰ ዋምነቴን ኣንጋምገ አዕዮኔ።

¹⁴ እሲን ዋዘም ጨብኔ ማርቱተ ደኦኖም።

መሲህ ሆጎተኔሃ

¹⁵ ቤቱሰ ለልበ መገን ሀንቅተ ምሳል፤ እሰን ክልቀቲች ጉዕሚችን ሀንገፈሃን።

¹⁶ መሰንትሰ ሰማንለክ ኡላን ዮእሩ ጉዕሙንኩ ለለኖሁለክ ለለኖበኣሁ ዋልቃመትለክ ገሽታእሩ ሀለቀትለክ ሹመት ጉዕሙንኩ ከለቀንቶኢሁ እሰ አዲንት፤ ጉዕሙርቹንኩ እሰ አዲን እሲንከ ከለቀሞኡ።

* **1:7** ኒን፡- የኖሃ መት-መቱ ሉህ ክታበት «ክዕኔን» ይታኣ። **1:7** ቆላ. 4፡12፤ ፍልሞ. 23። **1:14** ኤፌ. 1፡7።

17 እስን ጉዕመርቺች ብርንተ ሄዕዮ፤ ጉዕሙርቹንኩ አጽቀም ኡሬኢሁ እሲንት።

18 እስን ገይሰ ጅስመ እኮ መገን አመዕናኖ ዱእ ምኒሃ ቡዕለሃን፤ እስ ጉዕመ ጠዊሃ ብሬተ፤ ጉዕመ ጠዋንን ዎኔሃ እሆተ ሬሆች ኬእንከሰ ዎዕኔሃን።

19 እኩ መገኑ ቤትሰ ኣዜን መገኑ ዊመ ዊሚን ሄአኖገ ኢትዮኡ።

20 መሰቀል አሌን ዱንተዕዮ ቄጊንከሰ ወገሬት አኢን ኡላን እኮ ሰማን ዮ ጠወ ጉዕመንከ እስ አዲን እሲን ሀራርሴእ።

21 ሰውቲንከክዕኔለከ ሂለ ሆጎንተክዕኔ ባለጋረ እኬን መገኒች ቄዕርቲን ሄኤነንተ እቅ።

22 ቲሱ እኮጎሬ ሆፍቹለከ ቀነጤኖህዕኔርቹ ዮህዕኔበአረ ጠለላኑተ አዕይ እስ ብሬን ሆንጠህሶህዕኔተ መሲህ ጅስምሰ ሬሆ አዲን ሀራርሴህዕኔ።

23 አመዕነቲንከክዕኔ እጃረንቲን ጠጸ ገቲን ኡሪን ሞጮጭቲንተ እንጅሊን ተብሴች ሌንቄቅቶኑዕናን ጠረኝቲን ሄዕዬ። አዕኑ ሞጮጭቲንታሁለከ ሰሜች ዋርን ዮ ክልቀቲሃ ጉዕሚንከ ዱዱብሰሞ እንጂሉ ከኒት፤ አን ጳዉሎስ ከ እንጂሊሃ ካዲንቹ እኮም።

ጳዉሎሴ ሶቀም ሆጉተ

24 ቲሁ ክዕኔተኔሃ ቶጎም ኦርሻን ሙንደእም፤ መሲህ ጅስመሰ እኮ መገን አመዕናኖ ዱእ ምኒሃ ኣኤ ኦርሻች ሆፈአኖሃ ማሊንከኤ ዊንሻም።

25 መገን ላጋች መቲርቹሃ ፌሱዕናን ክዕኔሃ ኩሎተ መገኒች ኣሰሞኤ ኤጋን መገን አመዕናኖ ዱእ ምኒሃ ካዲንቹ እኮም።

26 ኩ ላገት ልግቤ ዘመኒሃ ክልቀቲሃ ጉዕሚንከ ለሉዕናን ምሰጥር እክ ሄዕዮ እቅ፤ ቲሁ እኮጎሬ መገኑ አመዕንታ መኒሃ ጉዕሚንከ ለልሾኡ።

27 መገኑ ከ ምሰጥር እሳሃ ለሊሾሰ፤ ሁኩንን አይሁደ እህበ መን በላን አበተ ቀባጡ፤ ካን ዩ መሲህ ክዕኔ ኣዜን ሄአሃሰ እስን ኬዕምኒሃኔ ተብሳሃ።

28 ነኡ መሲህ አዋጅናም፤ መኑ ጉዕመንኩ ጉዕመንከ መን መሲሂን አመዕነቲንከሰ ጠረኝ አዕን ሆንጠህንሶተ ሀይመተ ጉዕመንከ ተማርሰን ሸንዛም።

29 እስ ሎረ ዋልቃን ኣዜንከኤ አአኖቤቹሃ ህከን ዋልቃን አጸመን ቆንዶዳም።

2

¹ ክዕኔተኔሃ ሎዶቅ ከተማን የ መንተኔሃለከ ህትን እልኤ ለእ ደጋበእ መንተኔሃ ጉዕሚነከ ሄንከ እጸማሞጎር ደጎኖተ ሀሳሞ።

² እጸማሚሁ ቀልቡሰ ጠረጌሃን ኢታን ሜጡብ እክ ዊመ ቀልብ ደእት መገን ሞሰጥር እኮ መሲህ ደጋገት።

³ ሀይመለከ ኤንኬዕን ቀባጡት ማጠንት የኢሁ መሲህ ቤቸንት።

⁴ ካን ያሚሁ እዪሁ ጡመ ላጋን ጠወአን ጣንሰኖህዕኔበእገ ይዪት።

⁵ ማሊን ክዕኔቶ ቄዕርዮም እቃ ሰውቲን ክዕኔን ሜጡብ የምቤቺሃ ጡመ ሴሪን ሄኦንከክዕኔለከ መሲህን የህዕኔ አመዕነት ጠረኝመተ ለዕይ ተሽ ይዮኤ።

መሲሂን ደገመኖ ዊመ ሄኤ

⁶ ቴሱ ቀርቾ መሲህ ኢሳን አመዕነቲንተገን እሲን ሜጡ እኬን ሄዕዬ።

⁷ እሲን ጠጸ አቲንለከ እጃረንቲን ተማርቲንተ ሃሊን አመዕነቶንከክዕኔ ጠረኝቲን ሄዕዬ፤ ዊም ደፈፈ ገለት ሆንጠህሼ።

⁸ መሲህ አሌን እሁዕነ መን ርሲንለከ ከን ኣዲንያ አሌን እጃረሞ ሴሪንለከ ተሰ ጣንሲን እዪሁ አግ መሰኖህዕኔበእገ አገዕርዬ።

⁹ መገን ጉዕመ ዊምመት ጅሰማን ለልት ሄኣኢሁ መሲሂንት።

¹⁰ ህትን አዕኑ ዊመ ሄኤ ደዕቲንታሁ ክልቀት ጉዕም አሌን ገሽለከ ሹምነት ጉዕም አሌን ሎረ ገሻንቹ እኮ መሲህ አዲኒት።

¹¹ እሲን ሜጡ እህንከክዕኔ ጡርከመንቲንታእ፤ ሁኩ ጡርከሙንኩ ጨበኘ ጅሰመ ከሞተ መሲሂን እኮሃ ጡርከሙ ቤሉ መን አንጋን እኮበእሃን።

¹² ጠመቀንቲንተ ወክት መሲሂን ሜጡብ ሞገንቲን ጠመቀሚንከክዕኔ መሲህን ሬሆች ኬኤንታእ፤ ሁኩንን መሲህ ሬሆች ኬሾ መገን ዋልቃን አመዕነቲንተቤቺሃት።

¹³ አዕኑ ጨብ አእንከክዕኔለከ ጨብክዕኔ ጅሰመ ጡርከሙ ሆገንተክዕኔ ሬቲንታእረ እቅ፤ ቴሱ እኮጎሬ መገኑ ጨብክዕኔ ጉዕመንከ «ፈቁን» ይ መሲሂን ሜጡብ ሄኤንተገ አዕዮህዕኔ።

¹⁴ እሰ ህከ ከሰሰኔለከ ግበኔ ሄዕዮ ኤዴ ቤሱኔ ለልሶተ ከተበሞ ሕገ ሸንሼእ፤ ህካንን መሲህ ኢሰ መሰቀል አሌን ሰቀል ኒ አልቶ ከሞ።

¹⁵ ህትን ዋልቃመተለከ ዳኛኑተ መሰቀል ዋልቃን ቄል በነቻን ዘህሰን ሙኑ ጉዕሙንኩ ለእኖሰገ አዕዮሰ።

16 ቱሱ እቸተኔሃ እኮ እቃ፥ አግተኔሃ እኮ እቃ፥ በዓል በሬተኔሃ እኮ እቃ፥ አገኑ ኣገኖ በርተኔሃ እኮ እቃ፥ አበ በሬተኔሃ አዪሁ አሌንከክዕኔ ፈረዱንከ።

17 ሁኩን ጉዕሙንኩ አሜቶተ ዮ ጠዊሃ ሀላሃን፤ እኮጎሬ ሀንቁስ ደገመኖሁ መሲሂንት።

18 ክዝቢን ገው ሆፍሲንለከ መላይካተ ሰገዲን ድከአኖ መቱ መንቹሁ ዋግቤሉ ፊሰኖህኔበእገ አገርዕዬ፤ ህትኔ መንቹ ለአኖ መናማን ጌሲች አበ ገውስ ቦንን ጨብሰሰ ሰውቲን ተሳን ቦነኖ።

19 ቡዕላ እኮ መሲህን ህትናሞ መንቹን መቱርቹሁ ደቀንሹ ዮሰበአ፤ ጅስሙ ጉዕሙንኩ ንጊንለከ ቡንቹን ሜጡበ እክ መገኑ ነሰኖ ሃሊን ነጽቶተ እቸተ ደእታኢሁ ቡዕል አዲኒት።

ክዝብ ትምርቲች አገዕሩ

20 መሲህን ሜጡበ ሬቲን ከን ኣዲንያ አል ዋጊች ሹልቲን አደ እኬንታች ቱሱ ኣዲንያ አልች አደ እህበ መንገ ሚሃት ህትኔ ትዛዝሃ ጠገንቲንታት።

21 ትዛዙንኩ አፎት፥ ቀመሶትለከ ኡልቶት የኖሃን።

22 ከ ጉዕመንከ ጠወ ጠወኣኢሁ ጥቅም ኣቶች ኤተሮን በአኖ ጠውጋት፤ እሰን መኑ ፋሼሃ ትምርትሃለከ ትዛዝሃ ጠለዕለ።

23 ኩ ትዛዙንኩ ገግሰ ሀሰሻች ሰገደን፥ ገዉ ሆፍሲንለከ ገይ ጅስመ ሚዕረን ህካን አኣተ አጳሚንከሰ ሀይመት ዮሰሃ አጉደኖ፤ ጠዉ እኮጎሬ ሁኩን ጅስም ሂለ ጠወ አገዕርሃ መቱርቹሃ ደግለለኖበእ።

3

መሲሂን ሃዕር ሄኡ ደእተኔሃ

1 ቱሱ መሲሂን ሜጡበ ሬሆች ኬኤንተቤቹሃ አሌ ሰማን መሲህ መገን መኬ አዲን አፋዕል ዮቤቾን ዮ ጠወ ሀሼ።

2 አሌ ሰማን ዮ ጠውተኔሃ ሰውይዬ ቤሉ ኣዲንያ አሌን ዮ ጠውተኔሃ ሰውይቶኖቹ።

3 መሰንትስ አዕኑ ሬቲንተቤቹሃ ህትን ሄኡክዕኔ መሲሂን መገን ኣዜን ማጠሞኡ።

4 ሄኡክዕኔ እኮ መሲህ አሜተኖ በር አዕኑ እሲን ሜጡበ ኬዕምኚን ለልቲንተ።

ኑባቹለከ ሃዕር ሄኡ

5 ቲሱ ከን ኣዲንያ አሊች እኮ ማልክዕኔ ሄዕላቸተ ጉዕመንከ ሽዬ፤ ሁኩንን ዝነተ፥ ኣዝ ንጃሰመተ፥ ማል ሂለ ሄዕላቸተለከ ሸርኬተ ሰገዱ እኮ ሄዕላቸታን።

6 ከን ጠው መሳን አዘዘምበ መን አሌን መገን ኡሙዕርት አሜታኦ።

7 አዕኑ ገዉክዕኔ ከኒች ብርተ ህከ ጠወ አቲን ሄኤነንተረ እቅ።

8 ቲሁ እኮጎሬ ኡሙዕርተ፥ ንዴቱ፥ ሂልመተ፥ ቦሮሪንሽ ክዕኔች ከሜ፤ አፌች ፋለኖ ሙልሰኖ ጠዉሁ አፌችክዕኔ ፋሉንከ።

9 መሰንትሰ ኑባጼ መንቹ ሆጎንተሰ ፋሽቲን ኡጅቲንታች መት-መትሃክዕኔ ክዝብ ጠወኦኖቹ።

10 ካልቀ ደነ አጉዲሃ ኤንኬዕኒን ሃዕሮ እኮ መንቹ ኦደዕዬ።

11 ህከን ግርክለክ አይሁድ በላን ህከረንገ ጡርከመሞለክ ጡርከመምበ መን በላን ህከረንገ ኤንኬዕናሙለክ ገው በላን ህከረንገ ሰዎልድቹ ህከረንገ ሮሰች በላን አደደመት ዮበኦ፤ ጠዉ እኮጎሬ መሲህ ጉዕመ ጉዕሚኒት።

12 መገን መጠረንቲንተ ጠሊላኑተ ኢተንቲንታኦረ እኬንተቤቺሃ መረርሲጩ፥ ጎደበ ላፍመተ፥ ጡምመተ፥ ገው ሙግ አኡ፥ አታዕሉ ኦድኖገ ኦደዕዬ።

13 መት-መትክዕኔ ጠወ አታሌ፤ መቱክዕኔ መትክዕኔ አሌን ጎደበ አፊንተ ገዱት ዮሀዕኔጎሬ ፈቁን የቀሜ፤ ቀርቹ «ፈቁን» ዬገን አዕኑሁ «ፈቁን» ዩ ሀሰሰኖሀዕኔ።

14 ከን ጠውችን አበ ጉዕመንከ ጠወ ጭምአዕይ አፈኖ ዊመ ሜጦመተ ደግሲሳ ኢተተ ኦደዕዬ።

15 መቱ ጅሰመ እኬን ገኦንቲንታሁ ወገሬቲሃ እኮቤቺሃ መሲህ ወገሬቱ ቀልብክዕኔ ሀላዕሉን፤ ህትን ገለትጭቲንተረ እኬ።

16 መሲህ ላገት ኣዜንከክዕኔ ዊንት ሄኡን፤ መት-መቱክዕኔ ሀይማን መት-መቱክዕኔ ተማርሰዬ ህትን ሸጫቀሜ፤ መዝሙሪን፥ ዝክሪን፥ ጉዕመ መዝሙሪን መገኑ ቀልቢንከክዕኔ መዝሙሪን ገለትጭዬ።

17 አነ መገኑ እሲን ገለትጭቲን ላጋን እኮ እቃ ሆጎን አቲንተ ጠወ ጉዕመንከ ቀርቾ ኢሰ ሱዕሚን አዕዬ።

አመዕናኖ ገልቲ ሴረ

18 ምኒ አማኖ! ቀርቾ ኢሲሃ ሀሰሰኖሃ እኮቤቺሃ ምኒክዕኔ አኒሃ አዘዘሜ።

- 19 ምኒ ኣናከ! ምኒ ክዕኔ ኣማኑተ ኢትዬ፤ ጎደበ ጠረጳቶኖቹ።
 20 ኣሶ! ኩን ቀርቹ ሙንዲሲሲኖ እኮቤቹሃ ጉዕመርቻንን ኣናካተክዕኔለክ ኣማኖተክዕኔ ኣዘዘሜ።
 21 ኣናከትለክ ኣማኑት! ተብሳ ሙርታበእገ ኣሱክዕኔ ኣሙዕርት ገዝ ገዝ ይታገ ኣቶኖቹሰ።
 22 ርሶመ ሴራን ዮንተሩ! መነ ሙንዲሲሲሃለክ ለሊሃ እሁዕነ ጡመ ቀልቢን ቀርቹ ዋጅቴንን ኣዲንያ ኣል ቀርቻኖተ ጉዕመርቻንን ኣዘዘሜ።
 23 ኣቴነተርቹ ጉዕመንከ መኒሃ እሁዕነ መገኒሃ ኣቴነተሀንገ ኣቴን ዊመ ቀልቢንክክዕኔ ኣዕዬ።
 24 መገን ቤቹች ሌቂገ ኣኣቴነተር ርሰቱ ዮገ ደጌነነተ፤ ካደንቴነታንኩ ቀርቹ መሲሂት።
 25 ሂለ ኣዕዮ መንቹ ሆጎስ ወጥ ደኣኖ፤ መገን ኣኔን ጎልትት ዮበኣ።

4

1 ቀርቻኖ! ክዕኔሃ ሰማን ቀርቹ ዮህዕኔገ ደጌነነተቤቹሃ ካደንታህዕኔረ ጡምማንለክ ቅጡ ኣቴን ገሸዬሰ።

ሸዘነተ

- 2 ገለትጭቴንን ጉዕመንከ ወክት ጠረጳቴን ዱኣ ኣዕዬ።
 3 እን ኡሱረኻ እኮሚሁ መሲህ ምስጥር ኣዋጅተ መገኑ ላገሰ ኡሩተ ፈኖኔተ ኔሳሃ ዱኣ ኣዕዬ።
 4 ህትን ጠወኡ ሀስሰኖኤገ ላገሰ መኒሃ ኣጋገ ጠወኡተ ዱኣ ኣዕዬኤ።
 5 ኣብሌ ዮ መኒን ሜጡበ ዮህዕኔ ደቀንሺን ሀይማን ሄዕዬ፤ ደገሞ ገንባቴን ጉዕማን ደግለሸቀሜ።
 6 መት-መቶ መኒሃ ህት ኣቴን መሰለ ኣሱ ሀስሰኖህዕኔገ ደጎኖተ ጠወኡክዕኔ መጥኔገ ጤኣኖሃለክ ጉዕመ ወክት ኣሰቶን ዊሞሃ እሁን።

መጨረሻ ወገሬትተኔሃ

7 ኢተሞ ኣመ ቤቱለክ ኣመዕነሞ ካድንቹ ኢን ሜጡበ ቀርቹ ሆተተ ኣኣኖ ቲቂቆስ ኢ ጠወ ጉዕመንከ ኩለኖህዕኔ።

⁸ እሱሃ ክዕኔቤቹ ሶኮሚሁ ነኡ ሄዕናሞ ሀል ክዕኔሃ ኩሎተለክ ቀልብክዕኔ ጠረኝሶታት።

⁹ እሲንን ሜጡብ ክዕኔ አዲሃ እኮ አመዕነሞለክ ኢተሞ አመኔቤቱ አናሲሞስ አሜተኖ፤ እስ ከኔ እኮ ጠወ ጉዕመንከ ኩልታህዕኔ።

¹⁰ እን ሜጡብ ኡሱረሞ አርሰጥሮኮሰለክ ባርናባሴ ለንካመ ቤቱ ማርቆስ ወገሬቱ የኖህዕኔት፤ ማርቆሴተኔንክ ቃግሾንክዕኔ ሶህት ኢልቶህዕኔ፤ ቴሱ ክዕኔቤቹ አሜኛ ወክት ቶጌሰ።

¹¹ «ኢዮሰጦሴ» ዬን ገኤኖ ኢያሱ «ወገሬቱ» የኖህዕኔት፤ መገን ዋሞነትተኔሃ እን ሜጡብ አታ መን በላን አይሁደ እኮእሩ ጠለዕል እሳት፤ ኤሳንከ ጠረኝሶኤ።

¹² ክዕኔ አዲኛ እኮ መሲህ ኢስ ካዲንቹ ኤጳፍራ ወገሬቱ የኖህዕኔት፤ እስን ሆሮ ጠረኝቱን ዊመ ዊሚን ረጀ ይቱን መገን ሀሰሻን ጉዕማን ጠረኝቱን ኡርቶኖተ ጉዕመ ወክት ክዕኔተኔሃ ዱኢን አጸመኖት።

¹³ ለንኪሃ እስ ክዕኔተኔሃ፤ ሎዶቅለክ ሂራፖሊስ ከተማን ዮ መኒሃ ጠረኝ አእኖገ ገዉእ መስከራሞ።

¹⁴ ኢተሞ ሀኪንቹ ሉቃሰለክ ህትን ዳማሲ «ወገሬቱ» ይታህዕኔት።

¹⁵ ሎዶቃን ዮ አመኔ ኦሱተለክ ቴሁ ንሞፋነለክ ሞኔንከሴ ዮ * መገን አመዕናኖ ዱእ ሞናተ «ወገሬቱ» ይዬ።

¹⁶ ተ ደብዳቤተ አዕኑ አነበቤንታች ኤተሮን ሎዶቃን ዮ መገን አመዕናኖ ዱእ ሞን በላን አነበበመኖገ አዕዬ፤ አዕኑ ሎዶቂች ሶህንታህዕኔ ደብዳቤተ አነበቤ።

¹⁷ አርኪጳሴንከ «ቀርቺች ቶጎንት ክድመተ መጨረሽስ ኢሊ ሹል» ይቱን ኩሌ።

¹⁸ ከ ወገሬት ገይኤ አንጋን ከተሶሚሁ አን ጳዉሎሴት፤ ኡሱር ሞኔን ዮሞገ ሰውይዬ፤

መገን አሰቱት ክዕኔኤን እኩን።

4:8 ኤፌ. 6:21-22። 4:9 ፍልሞ. 10-12። 4:10 ሶቀ. 19:29፤ 27:2፤ ፍልሞ. 24፤ ሶቀ. 12:12፤ 25፤ 13:13፤ 15:37-39። 4:12 ቆላ. 1:7፤ ፍልሞ. 23።

4:14 2 ጢሞ. 4:10-11፤ ፍልሞ. 24። * 4:15 ንሞፋነለክ ሞኔንከሴ ዮተኔሃ፡- የኖሁ መት-መቱ ክታበት «ኒሞፋሰለክ ሞኔንከሴ ዮተኔሃ» ይታእ። 4:17 ፍልሞ. 2።

ሃዕር ወኣድ መጻፈ

Alaba-K'abeena: ሃዕር ወኣድ መጻፈ (New Testament)

copyright © 2025 The Word for the World International

Language: Alaba-K'abeena (Alaba-K'abeena)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

740fd658-7c09-56dd-a374-995d21c2d66d